



Hafslo, 21.04.20

Informasjon om oppstart for 1. -4. kl. etter skulestenging.

Måndag 27. april får skulen endeleg lov til å starte oppatt for dei yngste elevane, og me gler oss til å møte elevane fysisk. Me har jobba intenst med å leggje til rette slik at elevar, føresette og tilsette skal vere trygge på at skuletilbodet er i samsvar til retningslinjene frå nasjonale myndigheiter. For at tilbodet skal vere forsvarleg så må me framleis tenkje dugnadsånd, difor er det viktig at vaksne og ungar held seg til punkta som er lista opp. Tre grunnpilarar for å bremse smittespreiing er: sjuke personar skal ikkje vere på skulen, god hygiene og redusert kontakt mellom personar. Sjå fylgjande link frå Utdanningsdirektoratet for meir informasjon: <https://www.udir.no/kvalitet-og-kompetanse/sikkerhet-og-beredskap/informasjon-om-koronaviruset/smittevernveileder/skoletrinn-1-7/smitteforebyggende-tiltak/>

Når skulen no har organisert og planlagt skulestart for 1.-4. klasse så er hovudfokuset vårt god hand- og hostehygiene, godt reinhald og redusert kontakt mellom personar. Elevar og vaksne med luftvegssymptomar og sjukdomskjensle skal ikkje møte opp på skule eller Sfo. Dei skal halde seg heime til dei har vore symptomfri i 1 døgn. Viktig at ein melder til kontaktlærer når ein elev er sjuk og har symptomar som tilseier covid-19 med vondt i halsen, forkjøling, lett hoste, feber, hodepine, muskelsmerter og magesmerter, så kontakt kommunehelsetenesta.

Skulen startar kl. 8.30 og varar til kl. 13.30 kvar dag. Det vert kun Sfo-tilbod kl. 13.30 – 15.30 no dei fyrste vekene. Påmelding til Sfo-tilbod ettermiddag har gått ut til heimane med frist for å melde på. Skulebussen går som vanleg, men **merk dykk** at no i denne perioden er det skuletid til kl. 13.30 fredag.

Hafslo barne- og ungdomsskule har måtte lage til ei kjernetid på kl. 8.30-13.30 når det gjeld skule, og kjernetid på kl. 13.30 – 15.30 når det gjeld Sfo. Grunnen til det er dei strenge retningslinjene når det gjeld smittevern for alderstrinna og gjennomføring med tilgjengeleg personalressursar. Når det gjeld skulen sine uteområder, så er dei stengt for utanforståande. Det er kun elevane og tilsette i 1. – 4. klasse og Sfo som får lov å nytte uteområda kl. 8.30 – 15.30.

Klassane har faste møtepunkt kvar dag ved levering og henting på skulen. Ingen foreldre i småskulen skal inn på skulen der 1. – 4. kl. skal vere.

Alle elevar skal møte opp på skulen kl. 8.30, og dei som ikkje tek skulebuss eller skal på Sfo kl. 13.30 blir henta på fylgjande plassar:

- 1.klasse har møteplass ved leikeskuret
- 2.kl møteplass i klatreparken
- 3.kl møteplass på kunstgrasbana
- 4.kl møteplass mellom barneskulen og samfunnsbygget.

Der vert elevane møtt av vaksne frå skulen og kvar klasse blir delt i to grupper(kohorter) A og B. Elevane vil tilhøyre same gruppe og ha dei same vaksne heile veka. Dei elevane som skal på Sfo følgjer same gruppe som skulegruppa og har den same vaksne (ass./miljør.) på Sfo.

Når elevane kjem på skulen om morgonen blir det ikkje slik som vanleg at ein kan sette i gang med leik. Ein må vente ilag med den vaksne og så går ein i samla flokk dit ein skal. Lurt å fortelje dette til dei søte små. **Dette gjer at ein ikkje kan møte tidlegare enn kl 8.30 for å leike før skulestart.**

Skuledagen kjem ikkje til å ha same rutinar som før. Det vert andre tider for ut/inn av garderoben, friminutt og lunsj, så skuleklokka kjem ikkje til å ringje. For å ha færrest elevar i garderobe og ute på uteområder, så må me dele inn i soner både inne og ute. Fint om de tek ein prat med eleven heime for å forklare dei at skulen er pålagt å ha strenge rutiner for å følgje nasjonale retningslinjer.

Skuledagen vil vere organisert på fylgjande måte:

- Oppmøte og henting ute på tilvist plass.
- Tilsette tek med si gruppe inn i garderoben. A og B i 1. klasse og A og B i 3. klasse går inn samstundes. 2. klasse og 4. klasse ventar i saman med sine vaksne til det er deira tur å gå inn. Tilsette tek med si gruppe til den plassen dei skal vere på starten av dagen; t.d. A gruppa i 1.klasse og 3.klasse går inn i sine garderobar medan B-gruppa i dei same klassane går til sine uteområde for dagen. 2. og 4. klasse ventar med sine vaksne til det er deira tur til å gå inn. Dette gjer at det kun er ei gruppe i kvar garderobe.
- 1. og 3. klasse har lik timeplan, og 2. og 4. klasse har lik timeplan.
- Gruppe A og B i ein klasse kjem ikkje til å vere i klasserommet eller andre rom på same tid, men friminuttet etter mat er dei to gruppene saman på si leikesone ute. Sjølv om dei er i same sone må kvar gruppe leike kvar for seg. Føremiddag: Gr. A inneaktivitet og gr. B uteaktivitet. Mat gr. A kl. 10.50 og gr. B kl. 11.15 + friminutt. Ettermiddag gr. A uteaktivitet og gr. B. inneaktivitet. Me byter på kva gruppe som er inne/ute på starten av dagen.
- Dei som har skulemjølk får det f.o.m. måndag. Dei som ikkje har skulemjølk har med seg eige drikke. Alle elevar må som vanleg ha med eiga matpakke. Elevar som skal ha Sfo-tilbod må i tillegg ha med seg ei matpakke som dei skal ete der.
- Når det gjeld skuleutstyr(læremiddel, leiker o.s.b.) så skal ein ikkje dele med kvarandre. Skal 4 stk. spele Ludo, så må ein vaske hender før ein startar å spele. Alle har kvar sin terning og si brikke, og slik utstyr oppbevarar elevane i kvar si korg i lag med lim, saks o.s.b. Når ein er ferdig med aktiviteten så er det ny handvask før ein skiftar til ei anna aktivitet.
- Utetøy må dei ta med seg heim kvar dag. Eitt sett bytetøy kan liggje i sekken.

Hjarteleg velkommen til skulestart måndag 27. april!

Mvh

Tilsette ved Hafslo barne- og ungdomsskule